

तुबारि संपादकीय
टीम

◆अस इ उम्मिद करुं लगो से कि एण बाड़े दिन अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पढ़ू जे इ पत्रिका शुरु कियो सि।

◆तुबारि एक अवाणिज्यिक पत्रिका भो।

◆तुबारि पत्रिका कोइ मेहणु, जनजाति, त संस्कृति गल्लि कहेण जे नेई छपाण लगो। अगर कोइ ई सोचता बि त अस जिम्मेवार नेई।

◆छपाणे पेहले सोभ आर्टिकल दुई टाई पांगेई मेहणु हुरालो असे। इ त खुलि बोक असि कि पेहिल बार पांगवाड़ी लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के मदद ना मिले त तुबारि पत्रिका कदि बि बंद भुई सकति।

◆कोइ चिज छपां सि या नेई छपां जे तुबारि संपादकीय टीमे पुरा अधिकार असा।

◆अस किलाड केन्द्रीय पुस्तकालय, त बजार राखे ठेके भैड हरिरामे दुकान अन्तर तुबारि ड्रॉप बॉक्स पुठ बि अपुं सझाव ओर आर्टिकल्स रखुं जे सुविधा कियो असि।

◆अस सोभि पांगि मेहणु जे हात जोड़ कई निवेदन कते कि, तुस बि कोइ अछा आर्टिकल, पुराणि या नौई कथा, कहावत, कविता, त नौवे घीत (पांगवाड़ी अन्तर) लिख कइ छपां जे हेंनदे दिए।

तुबारि संपादकीय टीम

9418431531

9418429574

9418329200

9418411199

9418411599



अलग-अलग असे, पर खरे असे cont...

मइदे सोच यक डबुदू इ भुन्ती: मइद यक डबुदू इ सोचते। अपु गी भोल त जदा सोच गीहे कम, अपु जुएली त गभुरु बारे भुन्ती-सिर्फ गीहे बारे; कम अन्तर भोल त पूरी सोच कमेरी भुन्ती-सिर्फ कमे बारे; सफर अन्तर भोल त जदा सोच सफरे बारे, मउं की झठ घेण? होरि केआ की अगरीण?-सिर्फ सफरे बारे; अपु दोस्ती जोड़ बोकि लगो भोल त जदा सोच क्रिकेट, राजनीति..... बारे- सिर्फ दोस्ती के बोकि बारे।

जदा टेम मइदे सोच इहाड़ि भुन्ती। इ असूल नेई पर इस अन्तर थोड़ा बदलाब भोड़ सकता। मइद, जदा समझदार (rational), तर्कसंगत (logic), त यक टेम अन्तर यके चीजे कना सुआ ध्यान भुन्ता, त यक चीज अन्तर सुआ गहराई जोड़ सोचता।

होर कना, जिल्हणु सोच यक गरोड़े जाले इ भुन्ती। डबुदू इ ना भुन्ती। जिल्हणु अन्तर सुआ लम्मी-चौड़ी सोचणे तागत असी। यक टेम अन्तर सुआ कना सोचती त सोभि सोचे यक जोड़ बणता। मइदे ई यक चीज या समस्या केआ होरी चीज या समस्या अलग ना कती। पर किछ बी भेड़ भुण लगो असु, सोभि कठु कर कइ सोचती। से कम अन्तर कम करणे टेम बी अपु टबरा, सहेली, खरीददारी, धणि बोक, राण-रणी बोक.....सोब किछ बारे घड़ी-घड़ी सोच सकती।

अ बुरी खबर ना भो, पर बढ़िया खबर भो। किस कि अलग-अलग तरीके जोड़ इस दुनिये हेर सकते; धणि- जुएली सोच अलग-अलग असी; अलग-अलग आशा; यक समस्या अलग-अलग हल कते। तउं यक होरी बदलणे कोशिश ना करे। पर अस अलग-अलग असे, समझणे कोशिश करे। समस्याई अलग-अलग हल कदणे बवजूद बी असी यकि-होरी तरीफ करिण। इ करियेल त अस यक तन-मन बड़ते।

नॉनी कथा

शुणे-शुणे अउं तुसी यक कथा शुणांती। नॉनी अपु भट-भणेजू कथा शुणा लगी। यक बोड़ुं ग्रां थियू। तठि हर सुख-सुविधा थी। ग्रां बाड़े सोब खुश थिए। तेस ग्रां दुई दोस्त थिए। तन्हि नउ थियू, रामनाथ त श्यामनाथ। रामनाथ सुआ बोडा व्यापारी थिआ। पर श्यामनाथ गरीब थिआ। तसे छोटा इ व्यापार थिआ। रामनाथ पैसा सुआ कमाताथ, पर खर्च ना कताथ। मेहणु बोकि-बोकि रामनाथ जे कंजूस बोतेथ। कसे-कसे मामले अन्तर त बिल्कुल मकखीचूस थिआ। कपले बी कसेरी मदत ना कताथ। ना कदि घुमण-फिरण जे घेन्ताथ।



जतू बी से कमाताथ सोब जोड़ी-जोड़ी रखताथ। रामनाथ बोताथ कि पैसा सुआ कमे, पर व्यर्थ खर्च ना करण। से सोचता रेहन्ताथ कि पैसा कीं ऐडयाल। झठ-झठ मउं केई सुआ पैसा कोठिया एईयाल। घड़ी-घड़ी अपु गभूरु जे बोताथ, तसे जीण व्यर्थ असु जस केई पैसा नेई। रुपेड़-पैसे बड़ दुनिये अन्तर सोब कम भुन्ते। जे गरीब असे, तन्हि रोज कष्ट भुन्ता। तउं त अउं बोता धन-दौलत सुआ कमा तउं जिन्दगी अन्तर कोइ कष्ट ना ऐन्ता।” रामनाथ जुएली त गभुरु तसे कंजूसी हेर सुआ दुखी थिए। तसे मर्जी खिलाफ से यक पैसा बी खर्च ना कइ सकतेथ। रोज सोचतेथ कि लाभ ई अस पैसे, जस अस अपु मर्जी खर्च बी ना सकते। सुआ लिंगि से बचरे पैसे मगते पर बेकार रामनाथ तन्के धे खर्चण जे यक पैसा बी ना देन्ताथ। से सोब सोचतेथ कि फाइदा ई अस पैसे, ना असी कदि सुसर लऊ त ना असी कदि सुसर खऊ। रामनाथ अपु दोस्त श्यामनाथ बी समझाता, कम ऐन्ता बस पैसा। अगर कस केइ पैसा असा त सोब मेहणु तें बणते। अगर पैसा नेइ त कोइ सात ना देन्ता।

श्यामनाथ पुठ तसे बोकि के कोइ असर ना भुन्ताथ। थोड़ा कमुणे बबजूद बी से त तसे परिवार सुख-शंति त हसता-खेलता रेहंताथ। बस रोज ईश्वरे धन्यवाद कताथ 'तेई सुआ दतो असु। अउं हमेशा ते ऋणी असा जे उपकार तेई मउं पुठ कियो असा।' थोड़े अन्तर बी सुआ खुश थिआ, पर चिन्ता कदि ना कताथ। सुआ फर्क थिआ तन्हि दुहि अन्तर। पर फिर बी दुहे सच्चे दोस्त थिए। सोच अलग, व्यापार अलग, विचार अलग पर फिर बी दुहि अन्तर कदि लडाई-झगडा ना भुआ। श्यामनाथ व्यापार मठइ सही, पर थोडु मत्ू किछ बि बच घेन्तूथ त सुआ खुश भोइ घेन्ताथ। तसे जुएली-गभुरु, यार-दोस्त, रिश्तेदार सोब खुश थिए, पैसा घट कमुंता पर प्यार जदा असा। श्यामनाथ जुएली बोती 'सच्चे स्वर्ग केआ बी अबल असु हैं गी। भगवान अगले जन्म बी इहणि कृपा करीण। श्यामनाथ जीणे तरीका सधारण थिआ, पर प्रेम जोइ भरीए थिआ। अपेपु बी खुश त होरी खुश रखताथ। आमदनी भले ही कम थी पर परवाह ना मारताथ। कमाई भले इ कम थी पर कदि बुरा काम ना किया त कसे चीजी लालच ना कीं। मेहनत कर कइ जतू बी कमाताथ, मजे जोइ तसे खर्चा चलताथ। घुमण फिरुण त दान पुण्य बी कताथ। हर दुखिया मेहणु के दुख बंटताथ। व्यर्थ चिन्ता ना कताथ।

यक लिंगि यक संत बाबा तेन्के ग्रां आ। दुहि दोस्ती सोचु संत बाबा दर्शन कते। दुहे संत बाबा केई पुजे त बाबा खुर बंने। तन्हि हेर कइ संत बाबा तन्के मन अन्तर की असु, बीझ गा। बाबे तन्हि जे बोलु कीं कष्ट असा त बोलीं दिए। न ता अपु गी घेइ कइ भगवाने नउ निए। श्यामनाथ बोलु 'बाबा जी! आशीर्वाद दिए, भगवाने दतो सुआ किछ असु पर सदबुधि लोती रेहो।' रामनाथे बोलु कृपा कर भगवान अति दौलत लोती मेओ कि अउं बोडा धनवान लोता बड़ो। तउं संत बाबे बोलु 'शुण बेटा, धने लालच इस दुनिये अन्तर सुआ बोडी बीमारी असी। भाग्य केआ जदा त बक्त केआ पहले किछ ना मेतू। जे जसे योग्य असा, भगवान तसे धे ततूरू देन्ता।' संत बाबे बोक शुण कइ रामनाथ सोचण लगा सुआ पैसे लालच अन्तर इ ना भो कि पछताण पड़े। सुआ पैसे लालच ना करण जतू भु तथ अन्तर सबर करण शिचण। सुआ पैसे लालच अन्तर इन्सान भटक घेन्ता।


अति कथा शुणाइ कइ नॉनी बोलुण लगी, 'बसे गभुरो, उघं ऐण लगी, अब उंघते।

कुछ खास खबर

- ◆ लगातार मौसम खराब भुणे बजई जुएई रौड बन असि त मेहणु पैंगेई कैआ बेहर घेण जे सुआ मुश्किल भुण लगो असि।
- ◆ बेमौसमी डग शीणे बजई जुओई पैंगेई चिरी त सिआउए फसल फुकी गई।

.स्कूल मैडम गभुरु केआ पुछण लगो असी...

बबीता



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

एडस बीमारी इन्सान जोइ यक लिंगि सम्बन्ध बणाणे बोलि कसे बी एडस एइ घेन्ता।... काँडोम सिर्फ 18% सुरक्षा कता।... एडस मेहणु के जिसम अन्तर कम से कम 7 केआ 10 साल तक कोइ लक्षण नजर न ऐन्ते.....ऐणे बाडी तुबारि अन्तर ।